

Kalaallit Nunaanni nuna tamakkerlugu naligiissitaanermut ullup ullulerfissaata Naalakkersuisunut aalajangigassatut siunnersuut.

(Inatsisartuni ilaasortaq Juliane Henningsen, Inuit Ataqatigiit)

Akissuteqaat.

(Isumaginninnermi Naalakkersuisoq Maliina Abelsen)

Siullermeerneqarnera.

Juliane Henningsen qujassuteqarfiginiarpara, saqqummiummagit ajornartorsiutit assigiinngitsunut tunngasut, uanga nammineq ullormut oqaluuserisassanut ilanngutissallugit kissaatigisimasakka.

Ullumikkut naligiissitaanermut isummap imarisaa arnat kisimik piginnaatitaaffinnut pingaaruteqartunut sorsuussutaanngilaq, assersuutigalugu assigiimmik sulianut assigiimmik akissarsiaqarneq. Naligiissitaaneq arnanut angutinullu ataatsimoorullugu suliassaavoq, tassaasoq arnaaneq angutaanerluunniit apeqqutaatinnagu pitsaanagerusunik assigiimmik periarfissaqarlernissamut pilersitsisussa.

Taamaattumillu nuannaarutigaa, Juliane Henningsenip inuiaqatigiisugut ilutsinni angutit nukappissallu ajornartorsiutaasa ilaat takusinnaammagit. Naligiissitaaneq naapertuilluarnermuinnag apeqqutaanngilaq - tassaavortarli isumalluuteqarnermut apeqqut. Inuiaqatigiinni nutaaliaasuni arnat angutillu peqataalluartut suliniuteqarluartullu atorfissaqartippagut. Isumaqqanngilarli tamatta assigiissasugut. Isumaqqarporli, killissarititaasut pilersissagigut taamaasilluta assigiinngissutigut nakuussutigilerlugit. Naalakkersuisut inuiaqatigiit assigiinngissutsinik inuillu ataasiakkaat namminneq qinigaannik ataqinnittut pilersissallugit kissaatigaat.

Naalakkersuisut maannakkut pisunut suliniutinik arlalinnik aallartitaqarput, naligiissitaanermullu apeqqutinut attuumassutillit attorneqartarput, assersuutigalugu qanigisariit akornanni nakuusertarneq pillugu ataatsimeersuarneq ulluni 25. - 26. november Katuami ingerlanneqartussa. Taamaasilluni naligiissitaanermik naalakkersuisoqarfimmit suliniuteqarput, kisiannili nassuerutigisariaqarparput, isumalluutit arlaannut atorniarlugit qineraangatsigu, taava isumalluutit allanut atugassaagaluit atorunnaarsittaratsigit. Tassungalu atatillugu uagut Naalakkersuisut tungitsinniit meeqqanut inuusuttunullu tunngasut immikkut saqqumilaartinniarlugit qinersimagatsigu (taamaasillunilu naligiissitaanermut apeqqutit ilanngunneqarsinnaasarlutik).

Naalakkersuisut isumaat unaavoq, ilutsinni inuiaqatigiisugut nuna tamakkerlugu naligiissitaanermut ullup uteqattaartumik qitiutittarnissaa ajunngitsumik isumannaassagaa. Kisiannili isumaqqarpuguttaq, qanoq isikkoqarnissaasa imarisasaanullu nassuiaatissanut suliassartaq Naligiissitaanermik Siunnersuisoqatigiinniimmat.

Naggasiullugulu erseqqissaqqilaarniarpara, Naalakkersuisut maannangaaq pilersaarutiginnimmassuk naligiissitaanermut tunngasut tulleriissaarinnermi kingullinnortinnissaat. Naalakkersuisut naligiissitaaneq nunatsinni ersaritsittuassallugu kissaatigisuarpaat. Taamaattumittaaq aningaasaqarnikkut sipaarniarnissamik pisariaqartitsigaluarluta Naligiissitaanermik Siunnersuisoqatigiinnut ukiumoortumik aningaasaliissutit aalajangiusimaannaratsigit.

Naalakkersuisut siunnersuutip akuerineqarnissaa siunnersuutigaat.